



梨仔蔗

記得還細該下，歇在苗栗鄉下，識聽阿姆講，較早該下，屋面前無幾遠有一條細車仔路，係阿爸撻甘蔗到苗栗糖廠蔗廊个細鐵枝路，逐日就有一車一車仔个甘蔗對屋面前撻等過；下把仔，阿爸轉夜會帶一截仔甘蔗轉來，毋過，該係攪糖用个竹蔗仔，無異大枝，蔗肉當硬，愛異大力正咬得落。

到較大兜仔，有一年，二哥討舖娘，新娘坐轎，轎臂項綁等兩支烏黥紅个甘蔗，掛頭掛尾，比竹蔗仔加異大笏。阿爸講這條安做梨仔蔗，係分人準果子食个。阿姆同這梨仔蔗削皮，毋係歸支仔削忒，有目頭个位仔削忒定定，過地就用刀仔刈到一短截一短截，一屋家人一儕擎一支，大家就食到又甜又幸福。這兩支阿嫂帶過來个嫁妝甘蔗，意思係愛新婚公婆兩儕，甜甜蜜蜜，雙燭透尾。阿姆剝甘蔗該下，將尾截帶蓋切下來做種，拿去菜園角項種。佢講，下二擺阿姊行嫁就有好做嫁妝。下後在別家菜園項看著有種梨仔蔗，大約就知係為著妹仔準備个嫁妝。

梨仔蔗食起來清甜清甜，牙齒愛有罅砸，咬落去脆脆會出聲，噍啊去會出糖水。有一條山歌个歌詞講「兩支甘蔗平平長，毋知哪支較有糖」，係唱出戀愛中个後生男女，面對共樣有中意个兩個對象，毋知愛選哪儕个心情。

食甘蔗，愛呷渣，定定仔噍，一下係無細膩就會哽著。故所老古人就會講「甘蔗一目食忒正一目」，係教人做事情愛有順序，照等規矩一步一步做等去，毋好貪遽；甘蔗同竹仔共樣有節有目，目頭項較硬，係無咬好勢，輒常會傷著牙齒；就像做頭路，半路項會堵著困難，難關過忒又係一段順境。

甘蔗做得製糖，毋過愛種到熟水，正較甜。有一句師傅話講「十二月甘蔗，兩頭甜」就係講甘蔗種到十二月就全熟哩，歸支仔就甜透地。這句師傅話還有一種意涵，係講人做人異圓滑，兩面光，麼人就毋會得罪著。

梨仔蔗恁甜，大人細子就愛食；對佢來講，心肝肚總係想著阿爸撻細車仔運甘蔗，同阿姆用菜刀刈忒甘蔗目个身影。

作者：龔萬灶

☆詞彙學習☆

【歇】hed：住。

【撻】sung：推。

【蔗廊】za pu：糖廠處理甘蔗的工場。

【討舖娘】to` bu` ngiong：娶妻。

【烏黥紅】vu` du fung：紅黑色。

【刈】ngan：用刀刀在物體上按壓的切割方式。

【下二擺】ha ngi bai：下一回，將來。

【罅砸】la zab：夠強。

【脆脆】coi coi：爽脆的樣子。

【呷渣】pi za：吐出糟粕。

【噍】ceu：咀嚼。

【細義】se ngi：小心。

【貪遽】tam` giag：貪快。

【熟】xiug：成熟。